

Մեր փոխարեն պատասխանեց մեր հիւրընկալը, ասելով, որ Աղթամարայ վանքիցն են գալիս:

– Ուրեմն ուխտաւորներ էք, – հարցրեց նա:

– Այո՛, ուխտաւորներ ենք, – պատասխանեց Չալլաղը, հետագօտելով նրա դէմքի թթու արտայայտութիւնները:

Առանց մեր հարցնելու, նա ասաց, թէ ինքը Բաղէշի դպրոցների վարժապետն է եւ, տասն տարուց աւելի կը լինի, որ այնտեղ ուսուցչութեան պաշտօն է վարում եւ ուրիշ շատ գործեր է կատարում:

– Ի՞նչ էք սովորեցնում, – հարցրեց Չալլաղը:

– Ծանօթացնում ենք սուրբ գրքերի հետ, – պատասխանեց նա:

– Այդքանը՞ միայն:

– Մի փոքր եւս աշխարհագրութիւն եւ թոաբանութիւն ենք սովորեցնում:

– Շա՛տ է այնտեղի բողոքականների թիւը:

– Այնքան շատ չէ: Իսկ գիւղերում տիրոջ գործը աճելու վրայ է:

– Գիւղերում դպրոցներ չունէ՞ք:

– Դեռեւս ո՛չ: Այժմ մենք բաւականանում ենք միայն կիրակնօրեայ կրթարաններով:

– Ուվէ՞ր են ձեր գլխաւորները:

– Ամերիկացի միսիոնարներ:

– Շա՛տ են թոով:

– Մի քանի ընտանիքներ միայն:

– Իսկ նրանց հասցրած աշակերտների թիւը՞:

– Այժմ բաւական կը լինէին:

– Ի՞նչ գործով են զբաղուած:

– Տիրոջ խօսքը տարածելու գործով. կամ քարոզութիւններ են անում, կամ վարժապետութիւն են անում եւ կամ թարգմանութիւններով են զբաղուած:

– Դուք էլ, ի հարկէ, նրանց աշակերտներից էք:

– Եւ առաջին աշակերտներից: Երբ միսիոնարները դեռ նոր էին եկած, իմ հայրը նրանց մօտ խոհարար էր, ինձ վերառին ու սովորեցրին: